

**Najib Umum Tambahan 2,000 Unit Rumah PPR Kota Baharu  
Bernama  
2 Mei, 2013**

KOTA BAHARU, 2 Mei (Bernama) -- Datuk Seri Najib Tun Razak hari ini mengumumkan tambahan 2,000 unit rumah akan dibina di bawah Projek Perumahan Rakyat (PPR) untuk warga Kota Baharu.

Najib berkata ini merupakan tambahan kepada 1,000 unit rumah PPR di Mukim Bandar dekat sini yang dilancarkan semasa lawatan beliau ke negeri itu Mac lepas.

"Rumah ini penting... bagaimana nak duduk rumah satu bilik, anak ramai. Saya cukup hairan perkara macam ini. Ini (pembinaan rumah) adalah sesuatu yang perlu dilakukan dan ini adalah pembaharuan yang perlu kita buat," katanya.

Mengumumkan berita gembira itu pada majlis perasmian Tuisyen Rakyat 1Malaysia di Maktab Sultan Ismail di sini, pengumuman Najib disambut tepukan gemuruh oleh ribuan penduduk Kota Baharu yang menghadiri majlis itu.

Pelaksanaan projek PPR fasa pertama itu mencatat rekod apabila dilaksanakan dalam tempoh 53 hari selepas dijanjikan perdana menteri pada 20 Jan lepas, selain bukti kukuh kepada rakyat Kelantan bahawa kerajaan Barisan Nasional menepati janji yang telah dibuat.

PPR Mukim Bandar berkeluasan 700 kaki persegi dengan tiga bilik tidur dan dua bilik air, yang dibina dengan kos kira-kira RM160,000 seunit, akan dijual pada harga hanya RM35,000 seunit selepas kerajaan memberi subsidi sebanyak RM125,000.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=946985>